

詩

東溟集二

EAST ASIAN LIBRARY  
KOREAN COLLECTION  
COLUMBIA UNIVERSITY  
NEW YORK, N. Y. 10027

RARE  
BOOK


chip  
2.67  
v.2

~~T~~  
~~3651~~  
~~K567~~  
~~2~~

東溟先生集卷之四

一善

金世廉



詩 槎上錄

德水 李植 汝固批評

崇禎丙子八月以日本通信副使受命出

國門

玉節龍章出 禁城南門祖席會公卿星文迥接扶

桑動查影先從碧漢橫只為交隣關 國體豈知柔

遠屬書生東南自此波濤靜還笑終軍謾請纓

一行

來船向忠原  
故四聯云

詩



路中

絕影東頭海路賒  
圃翁申老舊乘槎  
懷音自是來文德  
勤遠何曾枉使華  
渤海秋光生玉節  
扶桑曙色射金霞  
始知行止皆由命  
不必端居歎繫瓜

忠原得從事寄贈因次其韻

鳳節南馳出國門  
大江中泛日斜曛  
東西各向庭闈去  
湖嶺還驚驛路分  
專對卽今推俊士  
此身還幸並奇芬  
明朝更結金鰲約  
樽酒華堂細討云

過木溪有感

昔者同門友高才  
正妙年一朝摧鳳翮  
千古蟄龍泉



古屋滄江上，衰楊落日邊。  
欲題懷舊賦，隣笛更淒然。

烏嶺

烏嶺橫天石磴脩，盤回百折更添愁。  
高軒獨立千峯曉，絕頂平看萬里秋。  
天外紫光騰海日，雲間霽色出蓬丘。  
古稱三百能專對，不必登高賦遠遊。

永川次板上韻贈玄風諸益

天空木落鴈初迴，華閣高秋眺望開。  
嶺外山川臨海盡，城頭風雨渡江來。  
百年行止身千里，萬事悲歡酒一盃。  
駟馬不留諸客返，一回言別一低徊。

慶州次權學官

試韻

伯氣都消歇繁華異昔年荒城低落日古木冷踈煙  
玉笛聲仍絕金丸數孰傳人臣貴死國不獨太師賢

其二

表裡山河足自強千年伯氣已消亡赫居故闕空流  
水庾信孤墳半夕陽樂府尚傳新法曲女娘猶學舊  
宮粧金輿一去無回日鮑石亭前草樹荒

釜山次權學官韻

何處憑高騁遠眸海門風雨又高秋登樓獨倚南征  
筆入幕爭推第一流日黑魚龍怒天寒鼓角隱  
中洲自憐閉戶還多病乘興無心賦壯遊



次外弟許武韻

城頭鼓角咽清秋，都護行營大海陬。  
此去風濤應好返，別來親友莫深愁。  
遙山霧歇峯如沐，極浦潮平地欲浮。  
京國重逢更何日，夕陽徙倚鎮東樓。

其二

積水涵坤軸，洪濤撼古城。  
此行緣許國，終是坐虛名。  
檻外鰲山近，樽前馬島平。  
方期恢聖略，艱險不辭更。

送郭弘坡郭弘埏還玄風

蹇極來何遠，情深去復旋。  
相思曾幾日，此別又經年。



接榻官齋冷開樽湖月圓明朝掛帆席滄海浩無邊

其二

聞說南溪柳春來長綠陰江山空在目父老總知心  
別久何由見情多欲再尋今君向洛浦爲我問沙禽

次權學官韻

卓犖謝世紛恣意山泉賞中歲頗自韜折節守書幌  
雄心尚崛強奇氣或佚宕猛虎不受羈神龍豈易網  
聖朝且苦兵深憂唯海上可使折筆定忍見 邦威  
喪慨然出都門行色亦已壯巨海鼓洪濤中流失天  
壤茫茫萬里帆杳杳將何向天意欲助順孤臣敢拜

况方期得要領肯缺島酋望絕域歲崢嶸羈懷日悵  
快斗酒時自傾高篇每獨唱忠信尚可行威靈實所  
仗歸當景鍾銘不必彤弓貺

附原韻

弱植事濡翰早蒙諸公賞虛名三十載咄咄倚書  
幌少陵本懶拙阮籍頗疎宕邇來見羈束未能脫  
塵網前年赴燕都放歌金臺上昭王沒已久駿骨  
亦凋喪歸來飽音聞尚嫌觀未壯東南有扶桑巨  
瀆浸天壤秦童去不返萬里迷所向遊子出京華  
秋興助詩况海門莽迢遼故鄉不可望佳節迫重



九風景開悒悒黃花負幽意白雪愧高唱嚴程自有期忠信是吾仗盡言非短章要得瓊琚貺

附從事次韻

漫浪

方丈厭舊遊蓬萊入新賞男兒四方志安能守帷幌從我者誰子權生素放宕行矣乘海桴超然出世網經過古月城放歌星臺上一篇泣鬼神千年弔淪喪邊城九月秋風雨波濤壯馬島本外藩釜山接隣壤蠻酋導我前掛席欲何向遲遲有所待悄悄無佳况坐看歲云晚淹留月幾望聖恩尚羈縻夷情頗怏怏民居近關市殊音間樵唱故國



日以遠中宵夢天仗明發仗節去 王靈寶臨貺

留別外弟用權學官韻

地望歸吾族聲華擅大東文章出仲叔學術富家公  
羣從皆珠玉今君尚祖風乃兄那似舅老子欲成翁  
不及唯年妙相期在業隆形慚逸少穢句得惠連工  
瑞色爭看鳳神毛已蹕驄急難情不盡離合意何窮  
勿藥寧醫疾從朋利擊蒙一朝成斷梗萬里對飛蓬  
絕域遙懷惠羣心願蹙融乘查同博望設策笑終童  
地勢萊梁盡天文朔越通騰裝驅海若飛席貫濛鴻  
至澤今無遠孤臣敢有躬客程三島外離恨一杯中

變徵須停筑危弦莫奏桐旌旗明曉日鼓角向秋穹  
壯志頻看劒雄襟欲吐虹回帆應不遠休惜別匆匆  
次權學官韻呈上使

異區隔風壤大海中爲界習俗上首功居民雜水怪  
終當九世復適得二家解敵情尚未測馬島一何繪  
甘言挾虛喝陰謀左右賣奉使得夫子孤忠夙匪懈  
抗旌辭北闕張帆出南戒人生會一死國事寧  
再壞專對若循環殄愠同剔疥重見國勢尊再蘇  
斯民瘵致遠幸附驥輔行忝執珎晨裝凌海若離懷  
朔秋噫方思赴國難况復從公邁情親比骨肉禮



數遺卿介相勉在篤敬所慎惟疾憊平生此會難萬  
里茲遊快晤對無厭歇育中絕帶芥忘身甘履虎接  
遠戒觸蠆至樂貴知心神交非外話永垂千載名麟  
臺共圖畫

渡海

獵獵飛大旆縱縱列劒戟燈燭正錯落鼓角復奮激  
稍見宿霧上更喜朝曦射故國邈已遠滄海連天碧  
陽侯忽盪漾天吳爭奮擗四座咸失色舟中互辟易  
舍去固如斯誠敬實所宅是身既許國夷病安可  
擇瞻恩每震惕顧分徒跼踖浩然任所如惟思靜



蠻貊

從事次韻

破浪須巨艦賦詩須橫戟平生抱壯志遲暮愈感  
激垂堂匪至戒蓬矢初嘗射此行窮日域溟海浸  
空碧身命業已許離情肯寤擗凌晨掛帆席山川  
忽變易中流波蕩折笑傲陽侯宅我友二君子言  
行無可擇神明所臨貺蹈險寧跼蹐斜陽泊崖岸  
王威震蠻貊

入沙進浦作

客行厭水宿風波難具論巨海忽震盪沫互飛翻

停帆入枉渚，輟棹依山門。夜深微月出，曉起崩雲奔。  
鰐浦不可往，馬州非所言。登鱸望海盤，矯首眺天根。  
三山渺何在，六鰲寧復存。藥草思一折，玉藥安得援。  
金闕隔洪濤，至人秘羽幡。徒作懷仙謠，年邁望彌敦。

批云：翩翩有青蓮逸氣，又不失選體古格。

### 到鰐浦作

詰朝昏霧開，晨光射疊嶂。擊鼓出浦口，促棹破巨浪。  
東風掣大旗，五兩猶西向。辛勤傍洲渚，安得跨溟漲。  
兩岸忽中斷，石門正相望。言是鰐浦館，要我苦下舫。  
奔走擁飛船，羅列陳酒醬。供帳亦已設，宅舍頗草創。



試問同舟侶何如宿船上

次從事韻

黑雲千陣向西奔落日洪濤撼海門躍馬壯心嗟已  
老屠龍舊技向誰言蓬山咫尺身將到日域彈丸氣  
欲吞專對卽今推第一羨君新化北溟鯤

批云曹生壯語只合

律家  
措範

附原韻

諸神鉢我後先奔龍伯將迎闢海門蠻貊縱輕隨  
使節漢槎偏重載王言三山有藥應非遠小島如  
萍未足吞半夜狂風掀宇宙圖南還欲躡飛鯤



舟中次從事韻

東封不必一泥丸  
萬里乘槎爲去殘  
匣裡神符宵自語  
膝邊雄劒醉頻看  
指揮若定終歸化  
忠敬能行孰敢謾  
博望平生富奇怪  
眼中溟渤未專寬

其二

海門迴合隱遙峯  
清夜登艫淨客宵  
殊俗定應爭覩鳳  
老夫安得更猶龍  
扶桑日月生高嶽  
大壑風波捲上冬  
聞說壬辰曾積甲  
至今遺恨失除亮

鰐浦阻風

昨夜宿沙浦  
今朝滯豐城  
客心豈不苦  
風波不可行

曉起看海鷁日夕候檣旌片片黑雲起獵獵驚風生  
奔沫激馮夷白浪騰長鯨臨流不能發行楫計前程  
回首戀宸極絕目望大瀛不惜去人遠願得蠻貊  
平事大慮有遠義重生或輕誰令乏專對貽此越鄉  
情

批云詞  
理俱到

### 舟中書懷

日落船頭鼓角鳴陰風獵獵捲高旌河山極目中原  
接島嶼浮空大壑平老去雄心猶嗟惜醉來奇氣更  
縱橫東還始覺波濤息還勝當年十萬兵

郎可古望東萊列邑作



浮海亦已久客行殊未央徒念馬島近終知前路長  
星月夜寥落水天曉蒼茫引領見故國表裏皆可望  
雲中辨巨濟天際識機張停舟郎浦外思見華山陽  
風煙不可接何況隔殊方樂天雖可尚上策唯自強  
尚恐鯨鯢發一朝駭邊疆寄言分閫者努力守金湯

批云鴈行飽謝深得詩人之趣一篇之中三致意焉

### 次從事鰐浦夜泊韻

掛席中流望東南即故州風波臣節苦歲月客心愁  
異俗誰青眼同舟半白頭何時洛社會樽酒說斯遊  
次權學官詠橘韻



客有同舟子臨風嗅霜橘試問子何爲不食亦不掇  
言我戀高堂無因寄佳實食新心豈安感物思彌發  
倚閭日以苦遊子久驚骨欲飛安得翼故國隔溟渤  
子其停爾辭使我偏嗚咽此實最宜老厥性能已渴  
爾有毋欲遺繫我親已歿手線無復存弁髦久已絕  
永懷豈可及願子加慎密春還亦足懷應見慈顏悅

次從事西泊浦韻

泛泛陵逆風搖搖破巨浪雲陰忽黯慘海色紛百狀  
臨危氣自若蹈險神愈壯問我何能爾宿昔得由丈  
敬乃玉鑰匙誠爲防海嶂况復承王命忠信神所

貺外物雖萬變靈臺自清曠顧念夷島險遠自邃古  
初割據恣吞噬出沒隔洪漲只恐辭令淺行見威靈  
暢天日鑑在上玉節手自杖不辭探虎穴寧避涉炎  
瘴任子表獨立黃侯稍自放此行吾何憂二子皆時  
望

金浦

百舫齊繞翼彩舟高張錦幕泛中流蓬山臺闕天邊  
出日域山川鏡裏浮大旆危旌臨水怪鳴笳疊鼓舞  
陽侯古來徒說乘槎遠今日真成汗漫遊

次權學官韻



伐鼓縱金出極浦海波不動日當午船上大旗匝劒  
戟帳下健兒羅熊虎日域通信問幾迴奉使肯教歸  
思催誓令徼外款夷王不學張騫空往來

次從事韻

海天東望白雲開浦口迴船鼓角催萬里乘風同作  
客十年多病獨停杯龍旂迴度馮夷窟玉節高臨羽  
客臺欲問向來爭戰事古碑無字半青苔

次從事住吉祠韻

三面丹崖不作壙一間祠屋壓嵒嵒荒庭亂碎銀山  
落古壁常涵貝闕搖擊鼓馮夷來自舞駕雲何燒去



相邀蒼茫莫道神靈遠安穩風波送客橈

何仙姑常酌東海故

第六  
云

次從事鴨灘四絕

月落輕煙暗海村扁舟棹出古祠門故鄉極目滄溟

外魂夢猶能到北原

原州別號

其二

水國行裝候曉旌吉神祠畔問前程東南一髮山如  
黛云是豐前大筑城

其三

逢迎處處慣夷音山頂人家盡橘林盡角一聲天欲

曙碧波無際宿雲深

其四

日出平生願一看五更船上坐闌干海中赤氣圓難  
定瑞色先騰若木端

對馬島作

玉幣示誠信節鉞表將命禮以專對重事爲生靈請  
昔聞尋源使今作浮海聘鳴笳入在渚解纜依回巖  
孰謂九夷陋喜見一島盛桑門亦同出地主能遠迎  
零雨灑飛蓋密雲翳倒景挾衢士女合塞路簫鼓競  
雕牆盡大官榮戟列門屏館宅充厓里鷄鳴達四境

自非聖化遠安能享斯慶兩國盟可寒此邦先告  
病不見龍蛇變元孽自授領乃先罔不虔自昔著忠  
敬徃事須可戒曩轍慎勿幸兵端鬼所疾殺機人敢  
逞曾是荷生成始終宜自靖

對馬島次權學官韻

此地非吾鄉此郭非吾土入疆今幾日宿昔夢萊府  
忽覺在異縣孤舟滯沙浦顧此彈丸地蕞爾安足數  
士女雜雕題間閭盡板宇東南際大海檣舶皆蠻賈  
獸心雖累變厥俗亦易撫至敬唯跣足盛禮爲偃僂  
永使鯨鯢伏爭先鳳凰覩入幕子獨步輔行余淺魯



志士思喪元君子焉貨取辭令推叔向才華得僑父  
共立千載名羞與草木腐

次從事紀夢韻

夢裏分明謁聖明九天宮闕近西清寒宵獨起誰  
相伴萬里同行即弟兄

其二

斗酒愁來每獨傾客堂風竹亂秋聲蠻方觸目都非  
故窓外寒蟾似有情

馬島十絕

隔樹森森劒戟迴赤竿長翟更毳毼須臾入晚花裙

卒知是門前島主來

右島主

其二

紫羅衣上綴碑礪七寶袈裟梵字書幢影乍分金扇  
出衆髡髻擁兩筠輿

右二僧

其三

當階脫劔聳危冠赤足陞堂拜上官禮畢蠻童呈土  
物六苞霜橘紫金盤

右行禮

其四

妖童彩服各相耽五色花鈿艷翠嵐一自秦船留不  
返至今遺俗重童男

右小童

其五

頂赤唯存鬢後毛，無人不佩短長刀。  
南征健卒知誰是，半著花絲白戰袍。

右奉行

其六

板簷丹檻淨朝暉，新起三門闕盡扉。  
上閣遍開金色障，中堂盡設紫羅幃。

批云敘事逼唐

右正廳

其七

百尺棕櫚盡閣齊，小庭蒼栢舞山鷄。  
蠻人不屑溫房宿，金幕重重鎮水犀。

右寢堂

其八



金盤獻食簇時新  
方丈無非八海珍  
忽有兩童擎玉椀  
銀瓶細瀉碧霞春

右振舞

其九

小鱸添火沸春霞  
赤頂山僧坐點茶  
每日請呈新煎水  
病中新瘦不宜多

右煎茶

其十

沉沉帳幄曉光初  
當戶夷官立起居  
共說一行寒色滿  
夜來微霰灑庭除

右問安

從事次韻

強戴猴冠首屢回  
斷毛垂後羽毳毵  
傳言跣足中

門外爲是逢迎漢使來

右島主

其二

蠻方文字重碑礫故遣山僧管國書  
萬里遠來迎使節一雙金扇並籃輿

右兩僧

其三

赤頂無簪不受冠紫絲纏項是高官  
上堂再拜仍蒲伏曳地花裙更屈盤

右行禮

其四

斷指相盟俗所耽繡羅裁服剪雲嵐  
爭言富貴非難得執政于今盡美男

批云果如是則倭奴不足懼也

右小童

其五

視死從來等一毛  
借交相報有霜刀  
首功新得千金賞  
身上皆穿五色袍

右奉行

其六

坐見扶桑上曉暉  
建牙吹角敞重扉  
朝臺自昔清螺道  
賓館如今設綉幃

右正廳

其七

板扉橫閉翠帷齊  
臥聽蠻村唱曉鷄  
異俗本來無燠室  
辟寒爭致越中犀

右寢堂

其八



異俗盤飧觸眼新烹鮓焦鼈是兼珍金犁撓却雕  
胡飯玉椀盛來麴米春

右振舞

其九

活火頻添起彩霞山僧供客揀新茶日將七椀蘇  
枯肺却愧茲行負債多

右煎茶

其十

每日夷官趁曉初自言賓館不堪居更將棕簾循  
階祀恐有香塵爲掃除

右問安

島主席上兩僧求詩即走筆八韻

祖師何住此馬島即西門道伏人天大功安海岳尊

雙輪超覺地妙印得祇園交際能傾盖儒流本異源  
深情輸顧眄軟語接朝昏雙樹生靈籟扶桑射瑞暉  
此歡嗟已晚他日詎相譏異域方同慶音徽莫厭煩

其二

絕島誰能鎮曾聞杖錫東頂圓金粟影攝湧玉蓮叢  
不謂生中土安知接下風此心元不異見性獨難同  
杖節王程急停槎客禮隆玄機知化洽片語覺神通  
滿席天花亂當軒海日紅他時倘相憶歲歲有歸鴻  
召長老次韻

行李凌鰲浪乘槎東海門繡衣傳信重玉節仗義



尊揮筆壯騷席舉杯接禮園溫談排凜冽浩氣琅  
淵源兼憶伴郵馭幾遭問旦昏士峯千疊雪桑城  
一輪瞰批云奇句亦可尚天外縱雖遠夙因永弗讓人情  
何異土莫使客愁煩

璘西堂次韻

賢客偶來此傳音遠務東每因披玉藻恰若入芳  
叢詩力誰摩壘筆頭獨挾風眺望雲海隔交義古  
今同道與周基直國兼漢室隆德高天叵蓋機變  
電無通仰子彩眉白省吾愧面紅思功已成日社  
燕又春鴻



再步前韻以贈

宇宙垂三教何人合妙門聖推宣父極佛得釋迦尊  
龍象楞嚴會冠裳禮樂園存心唯一法見性即殊源  
反鑑能求照投珠固易昏相逢論色相此樂極星曠  
道學終難變風期不可諉治平有至訣莫道六經煩

其二

日域三韓外雄都析木東神仙瑤草窟釋子貝花叢  
隔海方爲境彌天豈異風山河佳氣合玉帛歲時同  
忽忝隣交重方知信義隆慈航隨處達慧照自相通  
律格尼珠白風神曉旭紅別離還不遠遺跡奈泥鴻

次召長老

飛錫真禪海外逢  
清臞猶帶雪山容  
慈雲滿坐天花亂  
雙樹前頭未覺冬

召長老原韻

對州太守偶見設宴席之日  
平綴醉吟一絕奉呈三位大人以索軒渠

莫道騷人罕  
遇逢祗今兩國共從容  
傳杯終日陶然語醉裏  
乾坤冬不冬

璘西堂次韻

謹步棠陰東堂呈三使僉大人雅什之韻

千里佳期今忽逢愧吾陪席對儀容近公和氣藹  
然處溫語一時排遣冬

次從事韻贈巴沙彌

空門無相又無緣一點尼珠色皎然吾道本來唯敬  
字欲將真訣問臞仙

客懷十絕

急雨初收海日斜樓臺遙望梵王家空庭寂寞無人  
到落盡枇杷滿樹花

其二

一夜寒聲捲海濤萬松東畔月輪高金屏睡起輕衾



冷小吏初呈白錦袍

其三

客堂風雪燭華殘  
繡幕金屏夜不寒  
自是孤臣偏戀主  
九天宮闕夢中看

其四

帆檣如簇泊南涯  
馬浦前頭浪拍沙  
欲上危樓望鄉國  
不知何處小中華

其五

轅門小卒絳袍單  
獨捻金笳倚傍一作曲欄  
向夜月明人盡宿  
一聲吹徹海天寒

批云何龍標

其六

霜林蕭瑟葉聲乾  
節序殊方屬歲闌  
爲語小童頻進酒  
曉來風雪十分寒

其七

同行火伴各歡顏  
艷服新裝闌綺紈  
入夜月明笳鼓作  
一時回首望鄉關

其八

萬里滄溟一葉通  
近江歸路赤關東  
平明日出波濤穩  
百尺蒲帆掛北風

其九

金幢處處候行人騎從如雲簇繡巾聞道大君重戒  
飭近江樓館一時新

其十

瓊林風動葉聲戰紫閣綠窓飛雪片夜半疎鍾來客  
堂天神山外流芳院

次權學官韻

萬里星槎析木東海邦何日此相通經綸當代稱秋  
老辭命吾家得麓翁篤敬自無蠻貊別孤忠還教古  
今同仙遊更喜清都近况復三山列眼中

紀事



粉壁高甍七百家府中南畔路岐斜東來斗覺天時  
暖十月枇杷始發花

其二

山上層層橘柚叢林間鍾磬是珠宮禿顱赤足奔兵  
衛長袴短刀列小童

次從事馬島書懷韻

借問重歸船何時發此島海水不盈咫東南是釜堡  
我欲寄尺書我懷向誰道只爲王事重非謂歸心惱  
所到紛水慄蠻酋亦先導客行豈不遙迴帆當及早  
骨肉日已遠相親卽輿皂屢經夕月弦喜看初日杲

死生盡臣節鑑之以蒼昊但聞北虜入居庸已不保  
扼腕氣欲塞枚血憤盈抱尚恐消息絕天威或顛倒  
奔問豈可後敵愾惟心禱忽憶壬丁役謀臣髮皆皓  
萬里東征遠八年王師老欲報皇朝恩連天滄海浩

一歧島

自我來窮髮風濤倦行役今日一歧島威儀太赫赫  
平洋列百艘布帆連雲白馬酋導我前兩髯能敬客  
拜跪禮益虔船頭每踉蹌日照大旗層波駕飛席  
千里在一瞬危檣高百尺風伯時鼓威陽侯互奔辟  
天地無端倪茫然但空碧人生貴快意安能戀故陌



倘遇安期生相尋問留舄

批云氣自昌大

次從事韻

茫茫滄海寬活活衆流小不到大方家安識吾身眇  
六合聖不論造化誰可曉大澤寄壘空萬物等鱗鰈  
孰知九州外各自環瀛繞長風日相盪層波空浩淼  
蛟龍內蕩涌萬怪紛天杳永爲百谷王蒼然帶八表  
六鰲更何事千秋戴孤嶠安得駕黿鼉一觀昇日暎  
自非鶴上仙周行忍未了中流掛高帆絕嶼依寒篠  
忽憶疇昔夢茲行亦前趾千里蹕一日輕舟疾於鳥  
赤松喜我至笑我久膠擾方期凡骨換肯遣憂心悄



人生忙石火世味苦秋蓼長生在鍊丹獨悟唯三藐

次權學官

觸處羊腸困險巇只今頭白已堪悲滄波萬里連天  
濶猶勝人間惡路歧

望霸家臺即朴堤上死處

七松遺跡儘堪哀千載孤魂尚未迴日暮數峯天外  
碧舟人說是霸家臺

舟中示二僧

二僧求見沿路作答以不足覽無已則即席  
走筆以資一哂遂覓韻得盛字口占四首以

贈

玉帛昔通好冠蓋今交聘江海旣無波疆域亦得正  
張帆出馬島促裝赴日柄樂國信可美見俗方知政  
民物亦以庶列島咸朝請蕩滌方內定指揮無遺勁  
自非君子化誰能享斯慶儻客欲盡禮大師特承命  
不謂入疆初得見白眉盛克慎賓主儀豈獨善辭令  
象教六典洽德業三昧並法相自莊嚴客心非外敬  
投分在片語雙情已交映綢繆結風徽慙慙吐高詠  
浮盃水驛險飛錫雲濤曩此幸信難得茲歡謂可竟  
永使斯民安無爲繼前聖



其二

交際重誠信和好貴通聘况值二邦驩適覩三階正  
大師實來儼人天夙專柄出敷龍象教入叅軍國政  
豈意境上逆若得霞中請方舟溟漲濶聯帆朔吹勁  
深眷動遠客禮厚能無慶小技敢自負揮翰亦惟命  
幸忝專對重獲覩至治盛肅肅揚風化赫赫布明令  
指揮方域靜鞭撻羣雄並輔弼各盡規中外同歸敬  
慈雲方四垂慧日又孤映相逢輒傾倒興來每獨詠  
且喜茲遊富不念還路夙休聞日以暢德烈方無竟  
盛事不可忘歸奏吾王聖



其三

今人喜開邊古人重修聘不祥是佳兵所貴唯守正  
爲國本以禮和謙得其柄欲觀斯民康必行聖人政  
念彼西方教蓋爲衆生請清淑濟流俗慈悲化豪勁  
各自尊所聞太平可同慶顧我生一時和隣忝奉命  
交際禮益肅逢迎意太盛遠客豈敢當言是大君令  
勝事欲重疊忽得二難并此會實宿緣片語生新敬  
楊枝時一灑慧月又能映共結蓮社約時作洛生詠  
益勉萬世驪莫道三機復永期道共流曷令德不竟  
請看海不揚中國自有聖

其四

中歲頗自負深居待三聘世故可立變寰區思一正  
謾涉霸王略不操尺寸柄文章企遷固劒術笑軻政  
甘受拾履辱肯教脫穎請雄心尚崛強杰氣猶橫勁  
讀書無不學獨造時自慶釋氏務定性老聃言復命  
晚曉儒家流始覺吾道盛天君一肅然百體自從令  
但使知行盡本無善惡并存心豈外求動靜得一敬  
虛明水月涵洞澈冰壺映樂同顏氏琴狂思舞雩詠  
發憤不知老勇往敢言復獨問主人惺自覺安心竟  
有爲亦若是徒希大舜聖



過博多州弔朴堤上次從事韻

質子何在白刃集鷄林小臣送輕楫鷄述叅雲海不  
枯怨入樂府留詩什地中凝碧問幾年冤抑孤魂天  
一邊百丈驚濤洩壯憤霸冢臺名千古傳惜哉羅運  
值中否內修外攘無足恃盜還之外更何策至今赫  
赫前日事殺身舍生誦尼孟人生一斃貴得正自古  
烈士非不多子獨使我偏起敬十里松林對赤關峯  
頭落月照容顏弔罷校血各惆悵悲風爲我來空灣

格軍謠

批云質而不  
俚透得謠體

倭人待一行極其恪敬上下餽廩各有差等



至於格軍所給一日一手斗半議謂米多則  
不可通一行只受一手斗還其餘格軍役苦  
多怨不得已盡給戲作格軍謔

咄咄復咄咄格軍當船宿不聞鼾睡聲惟聞發恨懊  
問汝何所恨問汝何所懊我亦無所恨我亦無所懊  
昨日見吏帖日本乞臣伏沿海發格軍使臣盡大祿  
入門無爺孃出門無仲叔破產理行李傾家備華服  
角弓西家賣黃犢東家鬻背着虎紋袍腰帶鹿皮篋  
朝發統營去暮泊釜山澳不聞少婦惜別愁但聞五  
更鼓角聲喔喔朝辭草梁去暮泊沙愁谷不見稚兒

索乳啼但見伺候倭人走踏踏萬里度若飛滄溟等  
平陸曙色生危檣濤聲撼高舳問我樂事誰最多同  
行火伴無反目問我苦事誰最多同行火伴盡枵腹  
此地一手斗我地二升穀朝食夕不足夕食朝必縮  
使道法甚嚴使道令甚肅欲語誠不敢欲訴誠惶蹙  
但願一飽足我輩不願粱與肉但願一喫盡我輩不  
買銀與穀我輩只自言苦辛我輩豈敢生怨讟但願  
速廻棹但願還我屋入門見我婦出門見我族脫我  
虎紋袍著我新白幘入我厨下竈實我鼎中餽酒醬  
既羅列左饘亦右粥離家八九月今日始免飢與暴



一醉當百金一飽當華轂人生百年食爲上醉飽不

羨羅州牧

古有人求官入京者曰不願他官願作羅州牧一時以爲笑此格軍皆全羅人故用

此  
事

次從事過赤間關韻

布帆日夜向天東瀛渤長吹萬里風鼓角廻凌川后  
宅旌旗亂動海王宮乾端地軸元相合越舶蠻商各  
自通若到仙山無杰句世間何處着詩雄

到上關

水濱村落遍螺蚌山頂龍嵒不作峯碧樹竹林相掩  
映不知時序屬玄冬



赤間關次從事韻

叢爾雕題民黑齒與伯仲太白何由入徐福又誰送  
祝髮舊俗傳六經古籍空關白旣虎踞天皇太倥傯  
無論日出入安分彼我夢大海隔中州東南但冥霧  
正朔所不及干戈自相鬪日爭蠻觸角方聞醢雞甕  
豈意殺機發適會兵氣動震蕩六路潰焚燒兩京烘  
飲血健兒憤張膽烈士痛百世必可復九廟能無慟  
凶徒忽內覆大坂殄孩孺上天旣假手鬼神實誘衷  
猛卒喜息肩謀臣思托諷一變復源緒三代傳家棟  
欵塞乞通聘輸琛請內貢國羞固已雪夷心燭必洞

往撫豈可緩廟筭久磨礱選价極時俊明公連底凍  
擊海起鯤鵬橫天明蝮螭顧我幸同舟安能忝執轡  
不願橐中裝一盡黃甘粽從俗使所重陳謨言或中  
荒服反白狼蠻夷賓五鳳來遠本在德仁固不可衆  
謀國貴自強巧作能無弄虺毒不忘噬鴟音終一哢  
懷柔倘得宜鞭笞亦可控深憂正爲此同行何發哄  
經海岸波濤極險舟人罔知所出以余色不變  
倭通事沙工等以爲怪遂次從事韻以示舟中  
大洋雖險遠島嶼亦可泊獨有赤間關古說波濤惡  
銀屋爭起伏雪山交騰躍巨石挾海門中流插山脚



陽侯旣奮發馮夷又鼓作脫險亦斯須舟中皆喪魄  
達人一死生君子能處約萬事實前定神理豈冥莫  
育中倘有主神色還自若矧此丈夫心青天貴磊落  
達能濟萬物窮當守一壑我生非偶然吾行誠綽綽  
鯁鯁視蛟龍鞭笞制鯨鯢正直神所相前修誠可託  
乞君流霞漿爲君定驚愕

又次從事韻以示舟中

此老膏中判死生一時危險不曾驚鬼神實識忠  
君意天日應臨報國誠萬里黑風吹海立五更白  
雨滿天橫存心自是儒家事還愧蠻人誦姓名



島主來謁乞詩卽寄二首

萊府鎮東服馬州殿西紀寔惟鎖鑰重非賢孰可倚  
一家今兩國和風同萬里傾蓋恨無路夙昔思執筆  
忝當交際盛獲觀符彩美披心靡覩敬吐辭絕外揣  
况值兩大師德業天人庇高會君子堂並坐陳華几  
金屏列大燭玉盤膾赤鯉合座同所樂但願歸期邇  
杯行豈空返肴至無留旨今日不極歡含情更何俟  
見眷良不啻撫已慚善使常聞詩人言君子綏福履  
願我賢主人百事遵道揆永懷踐舊好豈但濟行李  
克贊大君化赫世垂良軌

其二

悟彼嘉樹傳實惟君子章良會豈易得盛事不可常  
邂逅托風期遠道勞迎將長風鼓大壑萬里洪濤揚  
赤氣滿東南曉日生扶桑天寒宿霧盡島嶼澄清光  
飛帆接盡舳落席依高檣清眄縱難數嘉貺亦相望  
筠籠壓霜橘金合溢名香不惜行役苦但喜誠信彰  
飽德心無厭投契眷彌長交際豈別理篤敬無不咸  
心在海濱奠道許烝黎康赫赫贊大化肅肅整封疆  
各勉日新志白首無相忘

批云兩作並  
古雅渾厚

觀音寺

絕頂中宵沆瀣澄  
上方臺殿壓雲層  
諸天更覺空居近  
下界遙看積氣凝  
石壁驚濤搖盡舫  
金堤列燭亂漁燈  
平明又掛高帆去  
數月風波愧老僧

其二

日域山川列眼中  
危欄徙倚向西風  
孤槎杖節溟波濶  
萬里題詩筆力雄  
地勢古稱人字拆  
天文今見越州通  
蓬山欲問知何在  
隱若樓臺積水東

其三

五夜樓船鼓角高  
露餐風宿任波濤  
乘槎博望偏多苦  
杖節中郎已獨勞  
十月殊方交碧樹  
一年爲客半



霜毛登臨處處題詩遍誰識詞壇有此豪

其四

水邊官閣獨登臨檻外千家繞橘林地圻四州山勢  
盡天低八島海門深從軍久擲班超筆奉使寧携陸  
賈金聞道一邦爭拭目孰將文教變潮音

次從事韻

妙年聲價冠騷人專對殊方寵簡新異域山川迎  
氣色仙都日月喜來賓幸存膠漆欣同調敢把文章  
較後塵爲語路傍須快覩風姿不獨瑞時珍

其二

扶桑奉使輟承明羽蓋遙臨大坂城樽前擊劒蛟龍  
吼酒半揮毫雷雨生萬里辛勤唯一節十年夷險尚  
微誠馬州回首天連海休問歸槎幾月程

其三

日落天空波影恬海山無數露重尖幾羣劒戟爭迎  
節到處樓臺盡揭簾王事敢言行役苦風流喜得壯  
遊兼歸期屈指知非遠恐落玄冬雨雪嚴

其四

千家簾箔海雲邊夾路爭看繡轂駢玉樹青葱凝赤  
圍銀臺隱映類壺巔當窓星斗臨無地隔岸風波上

接天此去清都知不遠  
夜深鸞鶴下羣仙

室津詠懷

海天東望客程遙  
絕域蒼茫歲已彫  
四國山河明落日  
兩關風雪捲歸潮  
蓬萊玉闕知難到  
絳節仙翁若可招  
始覺浮生同夢幻  
驂鸞還欲出雲霄

題鍾離權像

昔師魏伯陽  
同講叅同契  
海外忽重逢  
相思幾千歲

題寒山子像

頭上三足蟠赤脚  
坐瑤草別來幾多時  
憐我顏色老

室津



祇役泛瀛壖相期度窮髮行止任風潮臨流不能發  
漠漠萬丈波皎皎寒宵月驚棹苦遄征停帆喜暫歇  
不怨行路長常恐筋力竭積病豈可達忘身思遠罰  
專對古所難夷情信艱疏

批云逼似康樂

大坂詩

玉連環體

昨宿室津汭朝發兵庫館中流望大坂突兀聳雲漢  
控壓陸海交壯麗一國冠樓船出迎客金房捲錦幔  
綠水架虹橋帆檣不可筭十里流百廛左右列飛觀  
數月任風潮行役猶未半今日舍舟楫始喜登彼岸  
其一彼岸誠樂土古稱神仙室六鼇豈誕傳三山此

其一仲雍或東入徐福來何日習俗類西秦富者多  
侈佚與我接隣好壤地亦已密冠蓋共修聘封疆各  
息卒奈何不自量一朝成蚌鷸萬代不共天所讐惟  
秀吉其二秀吉方虎視域內無交勁天日謂可射三  
韓謂可併殺機先自發兵端鬼所病平壤覆行長西  
生窘清正逆喘忽自斃遊魂難久倩不有大變革能  
逢再造盛亮徒盡虜薤廓清在俄頃試問西來將幾  
人保首領其三首領莫自保神理誠不昧桓桓大將  
軍威武方無外一舉蕩妖昏再舉殄狡獪重見舊業  
昌實當千一會百姓喜來蘇三軍頌除害疆場旣肅



清所同無留施薩摩雖善戰長劒亦將奈民心去已

久何人思秀賴

其四

秀賴乳臭兒稍大尚恃衆散金

得劒士阻兵思內閼斷尾時自蠶飢鷹還一弄逆順

既殊絕一戰勢必洞千勻壓鳥卵強弩射潰瓮塵糟

河海腥焚燒九霄烘餘孽無噍類少姬已先送請看

倚伏門奇禍乃反中

其五

反中亦天道豐臣惡已極

報應若影響殃慶非難測不戢將自焚况欲謀上國

上天實假手神明若先殛豈獨一邦慶爲我去蝨賊

寧論九世復重整先朝則舍我旄戈志變我衽金色

舊好亦已踐久長在修德

其六

修德亦不難誠信爲



第一慶泰欲重疊兩國俱寧謐 聖上擴無爲至德

就如日登庸皆峻良啓沃唯輔弼卒鍊有餘勇師出  
必以律山戎久陸梁突騎犯西術殲殄其巨魁餘衆  
爭屈膝功高必益謙夙夜戒無逸

其七

無逸敢自皇

交隣尤所慎共享太平樂大君務誠信令聞隨風遠  
聲烈與年峻三邊臥刁斗二紀息戰陣列島各效琛  
小大咸臣順尚喜武功洽行聞文教振臨貺自有禮  
專對能無遴同行俱時髦愧我獨非雋

其八

非雋將

何爲茲遊亦已壯觀樂類季札問政同叔向風俗旣  
不一請陳吾俗尚仁乃萬善元孝爲百行長父父而

子子人各親其上邑邑列庠序家家崇節讓詩書戒  
治忽禮樂禁邪放此道始何聖精一堯所倡其九所  
倡亦不多啓萬世學問思恕本一貫知行表三近孟  
沒不得傳濂洛應天運一從吾道東五賢始自奮寒  
一開來學靜晦繼往聞折衷得退陶若紫陽闡蘊王  
者必取法天下比洙汶吾亦學孔子舍是將何訓其

十  
○批云詞古理  
足出之不滯

舟中次權學官韻有懷兩僧

葱蘢碧樹鏡清流至月陂塘似素秋客裏行裝垂越  
橐醉來心事看吳鉤無窮大海環三界何處浮煙辨



九州爲問同舟休共遠他年能復此同遊

舟中

日出清江彩鷁齊萬家煙柳護金堤山連北海蟠中  
國水劃平原納九溪夾路歡聲瞻使節五雲佳氣捧  
函泥東來莫道堪乘興還覺行人面目顰

夜行 六言

青絲歷亂葦花一夜橫泛仙槎靄靄輕煙蓋水茫茫  
薄霧籠沙慙留平方始發此去定浦非賒月落空江  
欲曙鷄鳴何處人家

讀心經

六言



禪家最怕流注吾道先事操存俛仰再撫寰海須臾  
奔突狂猿敬乃一心主宰誠爲百善本根欲識羣邪  
淨處廓然晴空曉曦

本國寺

珠宮松檜鬱崔嵬寥落層陰滿玉臺落日歌鍾初地  
合架雲樓閣四天開階前說法龍能聽戶外看花鴿  
自迴向夜月明靈籟發萬竿脩竹影徘徊

題仙童擁帚

六言

若非金華醉客定是河上仙童欲掃瑤壇拜月中宵  
雲淨天空

題孤竹寒雀

六言

亭亭孤節獨上凜凜貞姿自若天寒數葉蕭疎何處  
飛來慕雀

本殿寺

蓮峯不在遠處處見珠宮鴈塔塵埃隔龍池節序窮  
竹簷懸暮雨金鐸響晨風歡喜人天極潮音頓覺雄  
倭京次權學官韻

渺然征路長憔悴倦行役水涉極溟漲陸行窮日域  
雄都溢萬室仲冬樹木碧停車眺四野壯麗信無敵  
遍據中國脊控引六州嗑小墨初卜兆桓武實相宅

詩



積貨列肆修農工各自適天皇擁虛器冠履一何逆  
朱宮禮上帝粉堦臨迴陌太阿倒已久萬事皆關白  
坐觀源平戰勝負非欣戚女皇方妙年善男勦日夕  
天皇卽前  
皇之女

今次

一名今須耶  
美濃州地方

蟠嶺鬱嵯峨琵琶湖廣且碧蒼松蔭長途綠竹被廣陌  
侵星戒徂兩夕暮尚行役淒風尋帷入飛霰縈茵白  
路逢綠髮翁對我舉金策世道一何阨榮名不足惜  
五味爽人口嗜欲亂五魄百年能幾時浮生一過客  
雲漢昔同遊塵埃今下謫請君上蓬山相期鍊丹石



批云不  
減潘陸

### 經家康戰場

昔聞源平戰伏尸平原赭沸聲若雷霆伏見先解瓦  
行長及安道盡是犯我者屠戮不旋踵奇禍實自賈  
國耻亦已雪皇天爲我假我經古戰場路左久立馬  
悲風忽以起慘慘西日下怒髮欲衝冠雄心向誰寫  
恨之十萬師生得豐臣副大哉源氏功百世保民社

### 大源

驅車長堤上還顧望大垣巨索連百艘浮梁駕川源  
曠野莽茫茫極目盡平原溝塍錯龍鱗徃徃見孤村

是時天地閉衆芳無復存窮陰欲殺節夕景易西昏  
去家如昨日霜雪忽已繁衆庶每爲生志士思喪元  
豈惜行役苦願得國勢尊

道中

衆山如玉映雲端橘柚人家暝色寒冷似東湖十月  
暮華山千疊雪中看

倭山皆白  
故落句云

次從事韻

結髮慕仙踪夢想懷蓬山蓬山隔溟渤可聞不可攀  
六鰲下巔巔羣龍傍結蟠自非羽化客古稱登涉艱  
伯陽少時師悶我困塵間况見東海水復作清淺灣

今來不我訪此去何當還雲輶擁鸞鶴爲我開天關  
稽首謁大仙女伴總清閑雙成方綠髮上元亦花顏  
冬至

奔走東西鬢髮蒼今年至日又殊方勞逸自從人事  
異生成尤覺主恩長天涯曉旭增新影地底羣陰  
動一陽遙憶紫宸鳴玉處五更燈燭綴鵷行

至日詠懷

國有鹽鷄衆倭今野馬餘奉綸來日域報聘歷陰墟  
水宿飛雲颿原馳按錦輿山川積雪後天地一陽初  
忽覺炎涼改還驚鬢髮踈客中今夕會海外此行孤



北望星辰遠東還歲月除夷音迷咫尺雲物隔鄉間  
戀闕誠多苦回鞭豈暫徐唯思布聖化歸奏越佗書

岡崎

海國關防固重壕又此城周遭極地險削立類天成  
殺氣纏危堞雄圖列衆營亮鋒相渾合戰血日縱橫  
自古稱難靖于今覺稍平天心惡殺戮嗟爾慎佳兵

次權生

虎穴吾何避臨河氣欲憑一年常道路萬里復霜冰  
短日沉寒霧長亭下曲陵獨嫌行李重投却赤枝藤  
道中奉從事

陸賈南征遠張騫出使頻  
吾徒各努力世事幾傷神  
逆旅形容老他鄉節物新  
不言征役久專對愧前人

道中紀事

畎畝清溪曲孤村亂谷中  
疎籬半落日古木起高風  
地僻煙霜淨天寒橘柚空  
如行嶺東路鄉思欲何窮

金絕河

河口控大坂近江望京國  
茲河復蕩漾襟帶壯鎌域  
旣得百二固山河信四塞  
海拆或天意地險亦已極  
雷雨忽中裂廣陸變深黑  
臨江列戰艘百萬未敢逼  
諸平昔亂政賴朝清  
君側鵲起據關東  
龍馳掃蠱賊



安德旣入海義仲又以踏太阿遂倒柄天皇但恭默  
擇肉逞虎視擅塲振鵬翼控引窮巖險金城呀周漁  
子孫尚不斲百世能血食國朝用敵禮天子降  
封勅平生阻聞見一朝戒征軾霜雨日夜沐川阜每  
泝陟樓船破巨浪四望迷南北大禁必先問國法我  
已識寸兵莫敢越婦女誰復匿山河不足恃戒之在  
修德

鎌倉卽江戶在武  
藏州謂之關東

### 數詩和青丘

一朝不自得擊劒事游俠二弓插雕服白馬幽并獵  
三邊方未和虜騎犯障堞四校莫敢先衆將歸我捷



五日不解甲短兵晝夜接六部爭叩額龍庭已震懾  
七擒不足道天子賞金牒八珍縱歡宴少妾嬌紅頰  
九族生光華賓僕盡敦協十載始還鄉百事唯心快  
其二

一氣運妙有天地爲橐籥二曜替隱現陰陽迭交錯  
三才託此身眇然稊米薄四端雖甚微惻隱宜先擴  
五倫縱異門忠孝爲其郭六藝若不習外物或來鑠  
七情倘不節本性乃先鑿八索亦空言典墳儘糟粕  
九十尚自勉俯仰無愧怍十室縱有之好學莫我若

### 富士山

雪岳峻嶒彩鳳翔半空佳氣鬱蒼蒼高陰廻落南冥  
外霽色全開北斗傍地接三山多玉樹天回萬疊壯  
金湯何當坐嘯高峯上獨叩雲門望八荒

其二

仄體

已覺茲行富覽觀富山千疊白噴岼西走駿河盤絕  
險北來江戶作長安中天半插圓峯起積雪高臨大  
壑寒絕頂飛昇最奇事欲將孤劒倚雲端

其三

崇山一望氣雄哉東北嵯峨劒戟回萬古靈鼇元扇  
翼十洲仙鶴此飛廻孤峯雪色中天盡絕頂雲陰大



壑來自古盧生誇目覩安能白日上銀臺

其四

士峯天半雪嵯峨立馬郊原選勝過玉樹曉懸暘谷  
日銀臺寒壓紫泥波裊仙頓覺三山近氣色高臨五  
岳多此去仙都還咫尺幾人登眺獨長歌

其五

尚憶秦皇靈藥求至今真境闕丹丘中峯迥壓蓬萊  
頂絕壑平看渤澥流此去仙翁誰復識向來銀闕隔  
重遊披衣獨傍天門嘯頭白人間未可留

其六

富山千疊雪中看削出瓊瑤萬古寒圓頂突爲孤鳳  
舞衆峯分作六螺盤批云何等氣緊雄蹲大地知無敵獨立  
中天孰敢干聞自太初留積素欲將長白較噴沔

其七

寒空不盡雪崔嵬此日褰帷霽色來嶺入駿河皆北  
轉水從金谷向西廻重關百匝由天設佳氣千齡特  
地開總爲此山能表裏登封安得勒銘才

其八

日邦佳氣曉葱葱霸業宏基勢自雄拆地滄溟生日  
月挿天圓嶠削芙蓉乘槎暫住中郎節觀樂還追季



子風隆碣勒成今已遠欲尋遺躅到高峰

松原

自別蓬萊歲幾迴誰將松子斲雲栽碧沙東畔三千  
樹應喜仙翁此日來

其二

中宵滴露濕龍鱗千歲茯苓結玉津一自赤松昇道  
後列仙多是啖松人

其三

危欄迢遞壓清流隔岸松林翠色浮夜靜海濤三萬  
里月明笙鶴下瀛洲

其四

亭亭偃盖欲迎誰  
曾見東皇過海時  
昨夜蓬萊清宴罷  
衆鸞翔集最高枝

其五

駕鶴駢鸞計太遲  
只今雙鬢已成絲  
桑田碧海須臾事  
唯有蒼松似舊時

其六

五更涼露月當空  
碧落銀河路自通  
陶老近來消息絕  
玉簫何處聽松風

其七



曾把霓旌駕白鳳  
桂花宮裏拜東皇  
須臾玉女來滄海  
報道新松已萬行

其八

青蛇寶劍七星文  
午夜松林掃白雲  
鐵笛一聲天似水  
世人誰識玉宸君

批云篇篇太白佳境

常近湖

北上常近巔  
艱哉何崔嵬  
清泥坂詰屈  
我馬亦已憊  
深谷邈無底  
積雪何皚皚  
陟彼萬仞崗  
忽見湖水回  
半空闢天潢  
萬古屯雲雷  
神木蔭其岸  
清涯被綠苔  
莫識造化意  
絕巔久徘徊  
徘徊送遠目  
曠然形神開

一氣但蒼然安能辨八垓髣像指蓬丘恍見金銀臺  
玉女顧我笑粲然奉玉杯容成奏妙曲浮丘領其顙  
試問穆天子何似瑤池隈

題畫障

淡路宇所請

秋江漠漠白鷗飛天外尖峯合翠微絕頂樓臺人不  
到釣船長帶夕陽歸

日光寺

積雪驕風萬木顛亂雲飛瀑入層巔橋危下瞰滄溟  
盡檻外平臨北斗懸未必福庭存妙訣安知吾輩即  
真仙東南極目寰區小槎上張騫較孰賢

其二

中峯縹渺逼雲孤，寂歷松杉近帝都。  
壑轉琳宮開法像，橋迴玉竦閼靈區。  
曾聞秘笈三山記，宛對真形五岳圖。  
下界不須驚鼓吹，看余箕坐嘯天衢。

其三

日照祇園霽色寒，衆峯如玉捧危欄。  
珠簾半捲諸天近，繡戶平臨碧海寬。  
千樹影迴金殿合，萬鈴聲徹鐵圍殘。  
仙遊不盡登臨興，雪積層崖踏遍難。

其四

疊嶂煙收曉日紅，化城登眺倚長風。  
波光迴接滄洲



澗岳勢遙連富士雄絕頂靈杉凌積雪亂巖飛瀑落  
晴空明朝杖節西南去方丈仙遊一夢中

次璘西堂

中華使者欲回程一節何曾愧子卿萬里江山輪指  
顧兩邦民物荷生成臨行不用黃金贈和曲還慚白  
雪聲回首舊遊空似夢玉峯長對月輪明

其二

天外風濤渺客程海槎今日返蘇卿席間龍象逢般  
若鼎立文章乏老成萬里不堪將作別此生何處得  
傳聲相思一夜空齋冷吟遍新詩坐到明

靈樞

在日光寺

仙都衆木總芬芳傳道靈樞自太荒氣接扶桑增黛  
色影通丹桂播清香虬鱗百丈排霄漢翠葉千齡傲  
雪霜入夜笙簫來絕頂願從高處駕鸞凰

次璘西堂

濁酒都門感慨重異鄉分手各愁容風波數月曾同  
苦顏面何年得再逢雲盡赤關天接水路經鳴屋馬  
如龍平生不解藏人善到處唯應說玉峯

題日出滄海圖

執政所求

午夜溟波噴瑞光六龍擎日上扶桑彤霞紫蓋紛無



數莫遣浮雲近太陽

出江戶

異域星槎此日迴海天西望路悠哉江山萬里留詩  
句燈燭三更命酒杯霜鬢益從王事換客心偏逐  
歲華催從前莫道龍鍾極商帝方思啓沃才

次璘西堂

客裏正元霽色新小庭梅蘂媚芳辰西還漸覺花深  
好領得扶桑處處春

紀事四首

傳命

關白能盡禮傳命正殿上肅肅設華茵執政實先相



簾外列奉行廡下羅諸將執爵勸我嘗金花炫百狀  
不敢留客入請客出就帳崇敬亦已極此制實初創  
足見國勢尊莫非王靈暢交際貴誠信千秋長  
不爽

其二 回禮

白金爲書函黃金作書牋裹以繡花囊足見禮數虔  
銀床列茶鐺朱提壓越綿金屏四十軸錦服六十聯  
稱以進上物此禮古無前執政前致辭調興昔巧諛  
有同講和初大君喜改遷唯願達聖王驩好保百  
年

其三 投金

命駕出江戶使事亦已畢  
驢行無不至覬享信非一  
送我橐中裝黃金一百鎰  
欲取恐廉傷欲還知望失  
中流擲白水從者皆振栗  
此物豈不貴視與泥沙匹  
寶氣必騰上千秋終一出  
魚龍恒辟易寒潭映白日

其四 請遊

請遊亦何意誇榮實所願  
肅敬有足取言辭太已遜  
一宿費萬金供帳非所論  
豈謂征途間獲此仙賞勸  
超然理征屐名山又非遠  
周覽苦日短况乃凌危巘  
急雪會留人歸程安足問  
前修尚可繼肩輿憶圃隱



登箱根嶺

故國雲天外歸帆幾月程  
丹心徒自苦白髮爲誰明  
杖節懷蘇子裝金笑陸生  
只應千載後殊俗誦佳名

絕域

絕域星槎遠波濤若木東  
初迴萬里日已作白頭翁  
歲換仍飛雪天寒更起風  
黃金付水伯休愧客裝空

人日

海國行難盡新春尚遠征  
落梅清見寺積雪駿河城  
萬里逢人日經年返客程  
相看俱白髮役役愧浮生

次權學官



絕國初回棹偏驚鬢髮新江山如送客花柳欲留人  
一節寧爲貴平生不作顰定知萊府飲瀾漫倒華巾

其二

行役經年久歸懷日日新神明應護我蠻貊也宜人  
拂盞梅爭笑迎鞭柳欲顰黑貂從弊盡霜髮亦承巾  
其三

生死論心地何曾白首新節旄方異域替盞即同人  
自倚東方慢還慚西子顰接床歡意冷不復整衣巾  
示同行

日域連丹徼交隣使价通往來唯一節生死任孤忠

客路驚波外人煙絕島中還同魏絳策金石愧和我  
經琵琶湖

湖濶兼天盡層城壓水濱疾風揚積雪落日下重雲  
行役身全老逢迎禮益勤往來詩興發還似未離羣  
上元

伏節扶桑久今春返客軒故鄉猶萬里今日屬三元  
嶺雪晨梅冷湖風夕浪翻年年逐道路征役未堪論  
題畫

赤脚翩然下九關不教雙眼覩人間來時折得瓊林  
葉吹徹秋空對碧山



題鵲鵲圖

可憐急難情原上獨飛鳴  
微物尚如此何人無弟兄  
次璘西堂留別

別後音書幾日通  
舊遊回首已成空  
相思莫道滄波隔  
夜夜攏客入夢中

其二

赤關遙接一歧通  
馬島歸程杳遠空  
酒盡發船人已遠  
片帆回首夕陽中

其三

殊方去住各沾裾  
一曲勞歌解纜初  
爲報故人頻問



訊馬州還有北來魚

其四

碧海茫茫島嶼稀  
赤間關外夕陽微  
蒼波極目孤帆遠  
漢使初將玉節歸

其五

津亭歌闋發行檣  
遠客歸懷日夜忙  
賓主一時能合漆  
昇平兩國戒苞桑  
追來惠遠偏傷別  
老去瞿曇只祝昌  
聞說馬州當再到  
相思須寄紫茸香

附璘西堂原韻

朝鮮國東溟大人公偶至吾邦作方外友

雖修交義不日告西歸雖索之懷不言可  
知漫賦兩篇式擬三疊

功成身退雖天道尤恨背花相去忙玉節生輝辭  
舊梓錦帆帶日出扶桑兩朝信義自今固三使才  
名從是昌君矢莫忘方外友古來儒釋德俱香

題杜牧之像

風流久結三生約一別揚州問幾春莫惜綠陰花已  
盡使君霜髮映華巾

題畫鷹

八月霜威重神鷹意氣豪鵬雛會一擊天外灑風毛

題畫鷄

唱罷天門曙高飛海色蒼人間尚曛黑旭日上扶桑  
島主持金障子乞詩

屋角祥雲暗小山幾家庭院設重關馬州太守方承

寵墻外初頒五百間

關白以能請信使給家基五百間

其二

千金寶劍色如虹夜夜風雷吼匣中脫賜使君應有

意兩邦和好永無窮

關白特賞島主寶劍故島主來求詩

春江曲

極目煙波望去舟春江送別幾時休愁多却羨鴛鴦



鳥雙去雙來泛碧流

其二

日出春江煙霧收  
菱歌處處起芳洲  
東風不解愁人意  
吹送飛花近客舟

其三

楊柳風多西日斜  
春江何處不飛花  
行人且近長堤泊  
夾路高樓盡酒家

其四

春江雨色白鷗添  
蘆笋初生水若縑  
日暮客帆浦外至  
一時樓上捲珠簾

其五

送客高樓春夜深海門風雨大江陰更吹玉笛梅花  
曲無那行人萬里心

右馬助持金紙乞詩即平成春之父

令子吾偏重相逢意却親英雄真有種氣槩不無神  
許主丹心苦憂時白髮新預愁離別日花滿鴨灘春  
鴨灘即馬助食邑在西泊  
不遠處西還經過之地

其二

霏霏暮雨濕梨花萬里初迴漢客槎莫道異邦成遠  
別馬州西北即中華

贈軍官四首

崔嵬雉岳山濤漾蟾江浪淑氣鍾神秀自古多名將  
李侯抱大材恂恂守謙讓投筆事弓馬雕虫不足尚  
半刺非棄擲畧城爲便養搃府實武選備局極時望  
黠虜昔驕矜風雪行遼障黑齒今不測波濤泛溟漲  
夷險敢自擇安危亦可仗顧我忝奉命自愧無寸長  
慎簡爲同事不扶焉用相遠近爭快覩休聲已先暢  
安得任鎖鑰永使國勢壯  
右李鎮川惟洞

其二

金侯起南服壯銳無與敵寶劒當必勵神鷹貴一擊



妙藝獨穿楊舉世誰爭的白額不足數窮猿號飛鏑  
半刺吾豈惜脫屣視州檄入典熊羆師精彩變壘壁  
南邊絕使价朝議甚北狄專對屬踈庸急難誰能析  
平生不識面險艱思共歷立談吐肝肺許以同羈勒  
水陸亘萬里情親同懿密唯思靖國憂驅馳非所  
恤卓異可許送聖上知第一右金判官光立

都監請勿送  
批如此故云

聖

其三

奉命有能否但問所從誰既得金與李白也才實  
奇士爲知己死宿昔欽風期臨行不辭險許往寧避

危萬戶非小官玉浦當南陞解印付軍吏促裝趁行  
麾長弓插象服楷矢何參差雄弧孰敢控夾路觀英  
姿我讀百將傳孫吳千載師射亦一人敵所貴敦書  
詩公今正妙年富貴同摘髭請看丁巳行錦南爲前  
規

右白萬戶士哲

其四

李侯不易得玅譽金白倫金子典禁旅白守南海  
濬子亦屬御營自辟寔無因聖上重斯行一朝  
許三人所貴邦國尊豈伊平生親披袂赴長途壯士  
寧顧身洪濤拍天濶萬里同苦辛老夫亦何幸所從

皆席珍不獨才藝俊最愛風習淳龍泉始出匣神虬  
初脫鱗時危見節義世亂識忠臣公輩各努力 國  
恩難重陳

右李司果俊望

舟中

長風掛帆席滄海濶無灣幾日夷程盡經年漢節還  
浮雲生四國芳草遍三關外域應懷惠終令款百蠻

赤間關

玉節經年天外還錦帆重過赤間關居人各怪容顏  
改萬里風波客路艱

彌陀寺守僧呈松雲弔安德天皇詩次贈



淪胥何人得濟艱只今遺廟水煙間博多津畔三更

月曾照宮娥白玉顏

批云諸篇皆逼盛唐擬議處更好

其二

梵宮寥落古城傍安德祠堂草樹荒擊鼓賽神村女  
散碧空無際海茫茫

其三

千年怨恨欲何窮嗚咽寒波日向東客來古祠春寂  
寂數聲村笛夕陽中

藍島

碧海迥連空長門近越中片雲隨去帆細雨濕孤蓬

布德 綸音暢觀風藻思雄異方爭快觀文彩愧秋翁

江戸雜詠爲島主題金障皆執政所請

百尺梧桐彩閣齊霽雲寒盡夕陽低別堂石嶼無人到琪樹千重彩翼棲

其二

馳道楊花撲馬蹄青樓春望日初低金戈玉勒紅塵合執政初廻第五堤

其三

畫閣重簾捲彩霞月明雲淨炫霜華誰家玉笛三更

發落盡牆東白玉花

其四

一生雄武冠三軍幾處寒旗立大勲爭道衆中看易  
辨寶刀常帶七星文

其五

小市南頭狹路斜樓臺遙望納言家阿郎不惜金襴  
濕細雨長堤踏落花

其六

清歌一曲舞花姝十二樓臺近九衢昨日長騎蠻客  
至玉盤擎進大秦珠



其七

層城繚繞水縈迴壁殿金樓次第開日午大官朝賀  
退兩行戈劒辟塵埃

其八

九街人靜近黃昏花月樓臺鎖翠垣今夜大君期曲  
宴奉行齊會內城門

其九

半空金閣是誰家屋角飛騰鳳吐霞獵騎夜迴神奈  
雪玉杯春醉日光花

神奈日光  
俱地名

其十

日落天高海氣寒萬家煙樹盡中看錦鞍綉勒皆豪  
士金屋瓊樓盡達官

其十一

重關複嶺屹相望天險由來百二強峯轉日光飛彩  
鳳港開滄海作金湯

其十二

樓閣玲瓏畫燭中五更冠劒集諸公平明日出扶桑  
底萬縷丹霞射海紅

其十三

重城屈曲繞池臺臘月梅花滿樹開莫道仙洲風浪

阻滄溟東畔即蓬萊

其十四

自是三千第一流  
門前檠戟列貔貅  
廿年執政功仍重  
威令長行六十州

其十五

石城東帶二江回  
碧海晴光落日來  
欲識大官齊會處  
青煙長繞七層臺

其十六

千羣教就水犀軍  
幕府春生組練文  
海外即今無一事  
只將馳獵較奇勲



其十七

二邦和好樂并平  
廿載東溟浪不驚  
不有馬州能款  
客風濤安得漢槎行

留別島主

一心殉國獨勞勞  
文彩當今絕代豪  
始覺此行功最  
重大君新贈萬金刀

其二

情深不覺動離憂  
惡管驅謳送客舟  
行到故鄉應有  
問風流唯說馬州侯

其三

玉節金章故國歸  
鳴灘南畔鴈初飛  
邦人若問東方事  
誠信交隣古亦稀

其四

明發行人故國歸  
中流鼓角引龍旂  
相思莫道音書絕  
春鴈年年向北飛

留別召長老

別酒臨流強自傾  
異邦分手若爲情  
乘槎獨許蘇卿節  
泛海還同達磨行  
落日春陰生絕嶼  
接天風浪出孤城  
相思夜夜多離夢  
莫道音容隔此生

其二

漢客歸槎豈再逢故人相送惜離客一時握手歡如  
夢萬里論交恨莫從豈有文章驚海內只將誠信保  
瀛封檣烏欲起樓船發回首扶桑意萬重

附龍洲詩

癸未使日本時

八月十三日還渡金絕河即金道源丙子  
奉使時投金處

金絕長河深復深中流仍想故人心千金若免齊  
高士玉貌何由傳至今



書東溟槎上錄後

詩之道通於使事春秋列國大夫交聘舉古詩而相諷勸謂之賦其義最盛自詩不復古而後之學士詞臣銜命四方紀事抒情尚有可觀可怨此乃使而詩非詩而使者也吾友金君道源爲人溫柔敦厚經行卓然詩其人也年前以副節使日本追蹤圃老泛翁之行屬疆事艱梗有難於前代例遣而能令殊俗聳服禮待加恭則此圃老泛翁之所不能致者也凡所歷覽酬應率以詩發之古詩逼選律絕擬唐勒成一卷琳琅鏘然數千里山川風

俗如在目前其亦盛矣彼方欽我文教卽公之片  
言隻字得之如獲千金雙壁珍藏誇說不已其致  
交際之歡洽 國命之尊重者此爲大助所謂詩  
而使使而詩者公皆有焉余旣卒業仍誌其槩俾  
後之學者知其大旨崇禎丁丑夏日嘉善大夫司  
憲府大司憲兼守弘文館大提學藝文館大提學  
同知 經筵春秋館成均館事澤堂李植題

題東溟槎上錄

嘗觀王司寇世貞題滕生所藏東人詩稱朝鮮固  
多詩人彬彬乎宣成間音也云蓋中朝以草昧之



功歸之北地信陽而本朝崔白始倡三唐荷谷起  
而雄鳴於一時則詩道之變與中朝相爲表裏者  
爲盛而滕生之東遊隨潁陽翁在我 康陵之季  
其時儔相諸公皆館閣能品王司寇非具眼哉余  
讀道源槎上錄拊卷而嘆曰瀏瀏乎其調也泚泚  
乎其聲也何其似荷谷公也古人謂楊褚無忝太  
史公之學余以爲道源之詩於荷谷公不翅無忝  
而已藉令道源與中朝學士大夫相周旋得盡其  
所學焉則具眼如王司寇者所稱許必不止謂宣  
成間音也而顧乃奉使海外蠻夷之國以其山川



民物風俗制度一發之詩使有所熏灌焉則雖所  
違之不同而厥施不亦博哉若其修聘之儀風雅  
之辨有諸公序引在歲舍戊寅中春既望東陽申  
翊聖書

題東溟槎上錄

晴窓盥手薔薇露讀盡東溟查上詩寶瑟高張鳳  
凰柱玉盤遍插珊瑚枝鶴天雲物收囊底鯨海煙  
波瀉硯池不有壯遊那得此巧君餘韻然霜髭  
卷中諸篇鏗鏘有聲珠玉交錯於金盤古人所  
未嘗有也敢將近體一首聊寓三歎之意已卯

五月金著國拜

敬題槎上錄後

往年不佞從東溟公使日域公以文章德望大爲  
倭奴所敬服得其隻字片言者不啻若崑璞之珍  
藏不佞間亦和而唱之見古遍康樂律近盛唐絕  
句則最得張王之體而聲韻亦有魯衛於太白龍  
標者此其吾東數百年來所未有也不佞時以淺  
見語及於公則公必搖手而止之今見澤老之批  
評則殆與不佞所語公者相符公之文章固無讓  
焉不佞之一得又何幸也太史公曰間巷之士非



附青雲之士烏能施於後世哉今以不佞之拙作而亦有載於其間則附驥之幸不佞實有之

丁丑十月之下浣幕下權試謹書

東溟槎上詩集序

某少時則觀夫子之言誦詩三百使四方不能專對雖多奚爲某竊惑焉以爲詩適以言志且唯吟咏其性情其於專對乎何有及觀於詩有遣使臣與使臣所作皆載焉至于春秋左氏所錄其列國使臣所賦尤多於是乎知使臣必須敦乎詩而詩亶爲使者藝不學詩固無以言矣仲尼之門唯賜



也稱可與言詩及至諸國構亂夫子獨使子貢圖  
存父母之魯得非以詩之效歟古有以三章之賦  
享九頓首之禮而其君以與有賴詩之時用顧何  
如邪若觀宋元以來使華之到我國未始不以歌  
詩交唱和斯亦皇華四牡之義而率皆以吟風咏  
月相雄長其鳥噪虫鳴卽無譏焉可也今觀東溟  
槎上之詩旣兼風雅之正有可以自興亦可以感  
發人之善心而使思無邪此乃爲詩家大旨故能  
抵列國之相諷而收子貢之所存嗚呼盛矣其所  
述地方天氣人俗與事物職官皆史也而草木鳥

獸之可識者亦多斯非真詩也歟其於公之日錄  
徵之矣公所作大抵皆本性情無所雕鏤其絕句  
多直致七言更清越且有豪宕律詩文質極彬彬  
皆自爲盛唐體格而古詩樂府直是建安骨氣要  
之爲一代正宗夫豈由春秋作而詩必亡歟其於  
是知王跡之不曾熄也若乃夫詩之用於世也外  
而供四方之專對內之爲一堂賡載以鳴國家  
之盛者將自公始其故喜幸以爲之序以竢其會

云

此序文不知爲某公所作文理與海槎日錄序  
文相似故姑爲入梓以俟更攷

東溟先生集卷之四

